

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E Varua te Atua, e te feia e haamori ia'na ra, e haamori ia ma te varua e te parau mau e tia'i." Ioa. 4: 24.

"Hamani ihora hoi te Atua i te taata ma to'na ihora huru, i hamani oia ia'na ma te hoho'a o te Atua ra; i hamani oia ia raua, o te tane e te vahine." Gen. 1: 27.

"Ia hoê atoa o outou huru aau e to te Mesia ra to Iesu; o te huru ia oia no te Atua e aore oia i parau e haru toroa ia faito atoa oia i te Atua." Phil. 2: 5, 6.

Nu. 11. 10 Atete, 1908. Mat. 1.

"E Varua te Atua"

"E Varua te Atua, e te feia e haamori ia'na ra, e haamori ia ma te varua e te parau mau e tia'i." Ioa. 4: 24.

Te parau nei te mau ekalesia atoa a te taata nei, E Varua te Atua, no reira aita to'na e tino. Mai te mea o te auraa mau te reira no teie nei irava parau, te ui atu nei matou i teie nei uiraa, oia hoi, ia tomo te taata i roto i te fare pureraa e haamori i te Atua ma te varua, eihea oia e vaiiho ai i to'na ra tino a haamori ai oia i te Atua ma te varua? Mai te mea aita e tia ia parauhia e tino to te Atua, no te mea e Varua ana'e Oia, aita atoa e tia ia tinohia te taata a haamori ai oia i te Atua ma te varua. Teie râ te vahi fifi, eihea te taata e vaiiho ai i to'na ra tino a haamori ai oia i te Atua ma te varua? E pee ê roa te mau vahi fifi

atoa mai te mea e farii tatou i te parau papu roa o te Bibilia e, ua hamanihia te taata i te hoho'a mau o te Atua, no reira e tino to te Atua, Gen. 1: 27; e tia'i ia tatou ia haamori e ia haamaitai i te Atua i to tatou tino e i to tatou varua atoa. I Kor. 6: 20.

Te parau nei te ekalesia Katolika e te man ekalesia Porosetane atoa, E Varua te Atua, (Ioa. 4. 24) e no reira aita roa to'na e tino. E Varua Oia, atira'tu ai.

Te parau atoa nei to tei haapao pae tahi atoa nei i te Bibilia e, "E aroha te Atua," (1 Ioa. 4: 8, 16) e no reira aita to'na e Varua. E aroha Oia, atira'tu ai.

Te parau atoa nei te taata no te haapaoraa mata hoê atoa ra, Ua hape roa outou atoa; aita te Atua e Varua, aita hoi oia e Aroha. Aita outou i ite i te maa parau i papaihia ra e, "E Maramarama te Atua?" (1 Ioa. 1: 5) Aita to'na e tino, aita Oia e Varua, aita hoi Oia e Aroha. E maramarama râ te Atua, atira'tu ai.

E homa e hoê â ia amuiraa taata te Katolika e te Porosetane, e to te haapaoraa pae tahi, e to te haapaoraa mata hoê atoa ra. Na to ratou feruriraa i nia i ta tatou nei irava tumu parau i faariro ia ratou ei hoê. Ua au roa to ratou feruriraa i na aito toopiti no roto i te nuu tama'i i farerei raua i nia i te hoê purumu i te vahi i faatiahia te hoê paruru ouma haana tama'i, i faanehenehehia e i faatiahia i nia i te hoê pou i te hiti purumu ei hi'oraa. Ua faauna-unahia taua paruru ra e auro anaana te tahi pae e e ario anaana te tahi pae. Ua hi'o noa raua i taua paruru anaana ra a haafatata'i raua te tahi i te tahi, e i te pae paruru tia mau ra raua i farerei ai; aroha'tura te tahi i te tahi, na ô atura te tahi: Mea nehenehe te paruru ouma auro nei i faatiahia e to tatou arii maitai rahi! Pahono maira te tahi, Parau mau ta oe e ta'u hoa here e, e ravea paari teie a te arii e faahanahana i te ohipa tama'i i roto i te mana'o o te mau taata atoa o te oire nei. Te maere nei râ vau ia oe i parau ai oe e e paruru auro teie nei paruru ario ra. Parau

faahou atura te tahi, O oe iho â tei hape, e tau hoa ino e, e ere teie i te paruru ario, e auro mau râ ia. Mârô noa maira te tahi e tae noa'tu ua tupu to raua riri rahi te tahi i te tahi, unuhi a'era i to raua 'o'e, e taputô ihora. Faaroo atura te mau ratere hahere i te maniania, tairuru maira te tiaa rahi taata, e ua uihia raua i te tumu i tama'i ai raua i nia i te purumu o te oire nei. Faatiahia maira te tumu o to raua mârôraa, ua pii maere atura te feia mataitai ma te reo hoê, na ô atura, Auê orua na taata maamaa e, eaha orua i ore i hi'opoa maitai? E auro mau hoi teie nei paruru i te tahi pae e e ario hoi i te tahi pae. Ua tia ta tei parau e auro ia, e ua tia hoi ta tei parau e ario ia. Ua hape apipiti hoi i te mea ua parau te tahi e ere i te mea auro e ua parau te tahi e ere i te mea ario. Ahiri ua hi'opoa orua i na paeau e piti, ua ore ia teie nei taputôraa.

Te parau atoa nei te Bibilia ua tia ta te Katolika e ta te Porosetane hoi i parau ai ratou e, E Varua te Atua, ua tia hoi ta to te haapaoraa pae tahi i parau ai ratou e, E Aroha te Atua, e ua tia hoi ta te haapaoraa Mata Hoê ra, i parau ai ratou e, E maramarama te Atua. Ua hape râ ratou atoa no te mea ua hi'o pae tahi noa e ua haapii tamau e, Aita to te Atua e tino, e aita hoi to'na e mau melo. Ahiri ratou e hi'o i te tahi pae atoa o te paruru ra e ite ai ratou e e tino hanahana e te tahuti ore to te Atua e ua paraparau ihora Oia ia Mose te mata i te mata mai te taata e paraparau i to'na hoa; (Num. 12: 7, 8. Exo. 33: 11) e e haroa-roahia hoi te parau a te Mesia, a na ô mai ai Oia e, "O tei hi'o mai ia'u ra, ua hi'o ia i te Metua," (Ioa. 14: 9) no te mea o te hoho'a mau ia Oia no te Metua. (Heb. 1: 3).

Ua haere atura Iesu i nia i te ra'i ma to'na tino atoa i te haerea, (Ohi. 1: 9-11) e ua ite a'era Setephano ia'na i te tiaraa i te rima atou o te Atua, mai te mea ra e e rima to'na. (Ohi. 7: 56) Aita'tu parau i roto i te Bibila i hau i te papu i teie na parau e piti, oia hoi:

1. E tino to te Atua; eiaha ei tino repo tahuti, ei tino

hanahana râ, te i'o e te ivi tahuti ore.

2. Te hinaaro nei te Atua ia riro te taata atoa mai ia'na atoa te huru, i te paeau tino e i te paeau varua atoa. No reira e faariro Oia i to tatou mau tino pohe noa ei tino tahuti ore; (Phil. 3: 21) e no reira hoi to'na faaitoit-pine-pine-raa mai ia tatou ia haapue tatou i te tao'a no te ra'i i roto i te aau, oia hoi te ite, te paari, te aroha, te faaroo, te faaoromai e te mau veretu e te mau mana atoa e tae noa'tu ua tae tatou i to'na ra i, e ua riro tatou mai ia'na atoa te huru. (Mat. 5: 48. Eph. 3: 19).

Te Avaava

Ia puhipuhia te avaava, na te huare i nia i te utu e faararirari i te reira, e na te utu hoi te reira pape avaava taero e faaote i roto i te tino. Ua parau mai te feia ite e na te avaava e faatupu i e vau huru ma'i êê, e e 20,000 feia tei pohe roa i te avaava i te matahiti hoê i Amerika. E mea ino roa te avaava i nia i te tamarii e te feia apî. I roto i te hoê fare auri te tapeahia ra e 600 taata no te mau hara i ravehia a taero ai ratou ra. E 500 o taua mau taata ra tei uihia i te mea tei faatupu i ta ratou inuraa ava, e ua parau mai ratou e, na te avaava ia i faatupu i te hiaai i te mata-mua. I te tama'iraa no Beritane raua o te Boa (Boer) i Aferika apatoa, 11,000 taata i te hoê mataienaa, i Beritane, tei hinaaroo ia riro ei faehau e haere i te tama'i. I te hi'opoaraa matamua e 8,000 tei faaorehia no te tino ma'i e te paruparu; e i te hi'opoaraa hopea a te taote e 1,200 noa iho tei faatiahia ia riro ei faehau. Ua faaitehia mai te tumu rahi i ino ai to ratou mau tino ra, o te avaava ia.

Te na ô nei te parau a te Atua: "E ere te avaava i to te tino, e ere atoa hoi i to te opu, e ere atoa hoi i te mea maitai na te taata, ei raau rii râ no te mau pepe, e no te puaatoro i pohe ma'i hoi; ia au râ te raveraahia mai te ite e te paari." B. F. S. 86: 1.

Te Faaroo e te Tatarahapa

“E teie nei, o te faaroo nei, o te tiaturi ia i te mau mea e tiaihia nei e te ite i te mau mea aore e hi'ohia nei. Aore e faaroo ra e ore roa oia e mauruuru: o te haamori i te Atua ra, e faaroo oia e, e Atua, e tia 'i, e o oia te faautua i te feia i imi papu ia'na ra. Heb. 11: 1, 6.

Tei Tahiti nei te hoê orometua Tiare o tei nenei i to'na mana'o no te huru o te parau no te faaroo e te tatarahapa ta matou e haapii atu nei. I roto i te “Ramepa Apî” e i te hoê buka iti atoa, “Te Roto Miti e Ta'na Hoturaa” i neia taua mana'o no'na ra. Tera mai te upoo parau i papaihia e ana i nia a'e i ta'na parau i reira, oia hoi, “Te hoê parau iti no te Evanelia Apî a Moromona.” I roto o te tino o te parau te faataa ra oia i te huru o te evanelia ta matou e haapii nei, oia hoi te parau tumu matamua o te evanelia nei, o te faaroo ia, e te piti o te parau ra, o te tatarahapa ia. Te na ô atoa maira oia i taua haapiiraa na matou nei.

“E mea hape roa ia; E parau faufaa ore to oe e haapii mai; ua tahuri noa'tu oe i te evanelia i faaite maira; e ohipa tamarî e te faufaa ore.”

Aita matou i peapea i to'na mana'o maori râ e riro te reira ei haavareraa i te taata e ei haapoiriraa i to ratou mana'o, o te vahi peapea ia. No reira, ia maramarama te taata no te parau mau o teie nei vahi, e tiviri i te mori i nia: “Tei te heheuraa o ta oe ra parau e noaa'i te maramarama.” Sal. 119: 130.

Te faaite maira Paulo i te huru o te faaroo; oia hoi “o te faaroo nei o te tiaturi ia i te mau mea e tiaihia nei.” Heb. 11: 1. E tena na, te faaroo nei, e tiaturiraa ia i te mau mea e tiaihia nei, to te pae tino e to te pae varua atoa. Oia ia, te tumu i faaapu ai te taata i te opaa, te umara, te taro, te puaatoro, e te mau mea atoa o te pae tino nei, o te faaroo ia e vai i roto ia'na ra, e e faufaa rii ta'na e noaa

mai i te reira. Ia ore râ te tiaturi i roto ia'na, e ore roa oia e rave i te hoê noa'tu ohipa. No te aha? No te mea ua ore te tumu i faaitoito ai oia i te raveraa i te ohipa. Aita te mau mea e tupu aore e tumu. To te pae tino teie, a hi'o atoa tatou na te pae varua.

Eaha te tumu te haamori nei tatou i te Atua? O te faaroo ia. "O te haamori i te Atua ra, e faaroo oia e, e Atua, e tia'i. 'E no te tiaturi papu hoi ia e,' e faautua mai oia i te feia e imi papu ia'na ra." Heb. 11: 6. Te ite nei tatou e, e mea tia roa ia vai te faaroo ei tumu no te haamoriraa e te imi-papu-raa i te Atua, e na taua tiaturiraa nei e faatupu i te imiraa ia'na na roto i te haapaoraa i ta'na mau faaueraa.

Ua parau maira Iesu, na o maira, "E ite outou ia ratou i ta ratou i faahotu mai." Mat. 7: 20. E no reira ua au te faaroo nei i te hoê tumu raau; te tumu ora ra e faahotu i ta'na iho huru, te tumu maitai e faahotu mai i te hotu maitai, area te tumu ino e faahotu mai i te hotu ino. Aita roa râ e hotu i itea i te tumu ore e te tumu pohe hoi. Oia atoa te faaroo nei. E tumu te faaroo o tei faahotu i to'na iho huru. Ia ore râ te faaroo, aore e hoturaa, oia hoi aore e haapaoraa i te parau a te Atua, e te haapaeraa i te ino. E mai te mea hoi e, e faaroo haavare to te hoê taata, e ore roa e itea te hoturaa e au i te Atua.

No te faaroo ora mau no Noa ma i haapao ai ratou i te parau a te Atua, ora atura ratou. Ta ratou haapaoraa, e hoturaa maitai ia. Area râ te feia i tiaturi i to ratou iho mana'o, oia hoi i te tumu haavare o tei faahotu mai i te haapao ore, ua pohe ana'e ia ratou.

A taio maite na i te Hebera, pene 11, ei reira e ite ai oe i te mau ohipa maere e te faahiahia tei tupu no roto i te faaroo. Ahiri râ ua ere ratou i taua mea tumu matamua roa i te evanelia, aita taua mau hoturaa faahiahia i itea mai.

No te faaroo, oia hoi te tiaturi i te parau a Petero i te mahana Penetekose i parau ra e, "E tatarahapa e ia bape-

tizohia outou atoa i te i'oa o Iesu Mesia ia matara te hara," i haapao ai na taata e 3,000, oia ia, ua tatarahapa, ua bap-tizohia ia matara te hara, e ua horoahia te Varua Maitai ia ratou. To ratou haapaoraa, e hoturaa ia no to ratou faaroo. E ere no ta ratou tatarahapa i faaroo ai e i haapao ai, no te tiaturi râ i na reira ai ratou.

No te tiaturiraa a Simona i tamata'i oia i te hoo i te mana o te Atua, ia roaa atoa te Varua Maitai e te feia i tuuhia te rima e ana, mai tei na reirahia e Petero raua o Ioane. Teie râ te vahi peapea, e tiaturiraa haavare to'na, oia i tiaturi ai e e riro te moni ei hoona i te mau mea o te pae varua mai tei te pae tino atoa. No te reira tumu haavare i roto i to'na ra aau i ore ai oia i ite ai i te hoturaa, ua parau hoi Petero ia'na, na o atura, "Ia reva atoa'tu ta oe moni e o oe atoa i te pohe, o oe i mana'o e hoona ta te Atua i horoa noa maira i te moni." Ohi. 8: 14-20.

E no reira ia itea i te taata atoa, o te tumu i rave ai te taata i te ohipa i te pae tino e te pae varua atoa, o te faaroo ia, oia hoi te tiaturiraa i te mau mea e tiaihia e ratou.

Ua parau maira Iesu, na o maira, "Ua tae i te tau, te fatata mai nei te basileia o te Atua; a tatarahapa, a faaroo mai i te evanelia nei." Mar. 1: 15.

Teie te irava tumu no te Tiare. Te na ô maira oia:

"E hoa, i roto i teie nei irava, eaha te parau matamua, o o te faaroo anei? o te tatarahapa anei? O te tatarahapa hoi ia. Eaha te piti o te parau? o te faaroo ia. Na Iesu iho i haapii mai."

Auê te popou o te feruriraa hohonn! Eaha te mea i tatarahapa ai te taata i te ino? E ere anei no te mea ua ra mua ratou i te faaroo i te faaueraa a te Atua ia haapae i te ino? E ere anei na te tatarahapa i faaite mai e, ua aahia te faaueraa a te Atua i roto i te aau ei tumu no reira mai te tatarahapa, mai ta te maa vî i faaite mai e te vai noa ra te tumu vî. Parau mau roa ia. Ia na mua te tumu, oia hoi te faaroo i te tupu e tia'i a hotu mai ai te tatarahapa; e na

te hoturaa i faaite mai e te vai ora noa ra te tumu; mai te mea râ ra pohe taua tumu ra, aore e hoturaa faahou, e no reira e riro te ino a te taata hara noa ei tapao ua pohe to'na faaroo e to'na tiaturi i te parau a te Atua. Atae hoi taua hurn taata ra!

Ta te Atua e titau mai i te hara nei, o te tatarahapa apitihia ia i to tatou faaroo. Nafea to raua apitiraa? Na ô: E tupu te tatarahapa na roto i te faaroo, mai te hotu i tupu no roto i te tumu raau. "Te ite ra hoi oe, e na te faaroo i faatupu i ta'na (ta Aberahama), ohipa e no te ohipa i tia roa'i te faaroo." Iak. 2: 22. "A faaite mai na oe i to oe faaroo aore e ohipa ra, a faaite atu ai au ia oe i to'u faaroo i ta'u nei ohipa." Iak. 2: 17, 18.

Te na ô maira te Tiare:

"A hi'o na i te tamaiti hopea e te telona! E mea apitinoahia te faaroo e te tatarahapa, te tatarahapa e te faaroo i roto i to raua aau."

Nafea to raua apitiraahia? Na ta raua tatarahapa anei i faatupu i ta raua faaroo? Eaha, e na mua te hotu i te iteraa mai, aore â te tumu i tupu mai? E mana'o hape roa ia. Eaha te faaroo? "O te faaroo nei, o te tiaturi ia i te mau mea e tiaihia nei." No te tiaturi o te tamaiti hopea e, e maitai ai oia i to'na ho'iraa'tu i to'na metua tane, i tatarahapa ai oia i ta'na ino i rave ra, a ho'i atu ai oia i to'na ra metua ma te aau haehaa. O te huru teie no te apitiraahia te tatarahapa i te faaroo no te tamaiti hopea. Luka 15: 11-32. No te tiaturi hoi o te telona i ta te Atua i parau mai e "E ao to tei haehaa te aau, no ratou hoi te basileia ra o te ao," i tau haehaa'tu ai oia i te Atua ia aroha mai ia'na. Luk. 18: 9-14.

Te ua ô atoa maira te orometua Tiare:

"Aita Iesu i faaite mai i te numera o te faaroo e te numera o te tatarahapa. Eaha oe e imi ai i te reira? E ohipa tamarii hoi ia e te faufaa ore!"

E ere ia i te haroaroaraa papau! E mea huru hohonu atu te feruriraa o te tamarii! E ite noa te tamarii ma te

imi ore e, o te tumu tei na mua, e na taua tumu ra e faatupu i te hotu. "Te ite ra hoi, e na te faaroo i faatupu i ta'na (ta Aberahama) ohipa, e no te ohipa i tia roa'i te faaroo." O vai te hoê taata tei na mua i te tatarahapa hou oia i faaroo ai? Aita roa'tu. Eaha e tia'i?

Mai te mea, oia mau ta te Tiare i haapii ra no te tatarahapa e te faaroo, eaha oia i tahuri noa i te reira na roto i ta'na ohipa baptizoraa aiû? Te tama'i ra ta'na ohipa i ta'na i haapii. E tia ia vai ia farii i te fatereraa au ore mai te reira te huru? Ia hi'o noa'tu te mana'o, o te Tiare iho â tei faaau ma te ite ore i to'na iho faahaparaa, ia'na i parau mai no te "evanelia apî," e te haapiiraa hape roa, e te tahiriraa i te numera ta te evanelia i faaite maira, e te ohipa tamarii e te faufaa ore!"

E no reira, e homa e, a hi'opoa maite na outou i te huru o teie nei parau. E ere ia ta teie nei parau iti i te evanelia apî. Te evanelia râ ta te Ekalesia a Iesu Mesia i te Feia Mo'a i te mau Mahaha Hopea nei e haapii atu nei, o te evanelia mau na'na, nona iho te i'oa i mairihia e ana i nia i ta'na Ekalesia nei; oia ia te evanelia mau a Iesu Mesia, ta'na i tuu mai i te feia mo'a i mutaa iho, e ta to te ao nei hoi i faarue atu; area râ ua faaite faahou maira te Fatu i te reira mai te ra'i mai, ua ite hoi matou. Apok. 14: 6, 7.

Te Taata Moo Ava Parau Tia

Te parahi ra te hoê taata i te oire ra Tomoto (Tombstone) i te tufaa fenua Arizona, i te Han Amerika, e fare hooraa ava to'na. Te na ô mai nei oia e, "E taata hoo ava parau-tia van. Eita ta'u hooraa i te ava e haere i te itiraa a faaite atu ai au i te parau mau." Ua nenei oia i te hoê parau ei faaiteraa'tu i te mau ino rahi e iri mai i nia i te feia e inu i ta'na ava; e te opere noa nei oia i taua parau ra na te taata atoa. Te parau atoa mai nei oia, Ua manuia roa ta'na hooraa i te ava e ua i to'na fare ava i te taata i te mau mahana atoa. Tera mai te parau nenei ta'na i opere noa:

NA TO'U MAU HOA E TE MAU TAATA TUPU: Ua maururu roa van i ta outou hooraa i ta'u mau ava i te mau mahana i mairi a'enei. Ua faa'i roa van i to'u fare i te mau huru uaina maitatai e te ava huru rau, e te faaite atu nei au ia outou atoa e faaitoitoe â van i te faariro i te taata atoa ei taero ava, ei oere e ei taata vevê e ani haere i te maa, e riro

ai ratou ei hopoia teiaha i nia i te feia maitatai. E faatupu ta'u mau ava i te taputo, te eiâ e te taparahi taata.

E faaiti hoi ta'u mau ava i ta outou tao'a, e faarahi i ta outou tarahu e e haapoto i to outou oraraa; e faarahi ia i te mau ati pohe e te mau ma'i rapaau ore. Na ta'u mau ava e aratai i te tahi pae taata i te pohe e e faariro i te tahi pae ei maamaa, e faahuru ê i te hiroa maitatai no vetahi e e faaore i te hau no te taatoaraa; e faariro hoi ia i te metua tane ei demoni, i te tara tane ei vahine ivi, i te mau tamarii ei otare, e i te taatoaraa ei veve roa. Na'u ta outou mau tamaroa e aratai i roto i te faaroo ore, e te taiata, e te ite ore, e te mau peu haama, e i te mau huru hara atoa. E faaturori au i te mau orometua, e opani i te evanelia, e haaviivii te ekalesia, e e haaparare hua i te pohe no te tino e te pohe no te varua ma to'u nei puai atoa. E na reira ia vau i ta'u taviniraa i te taata nei. E pohe paha to'u nei varua i hate, ia faaamu râ vau i to'u utuafare e tia'i—e na roto i taua ohipa ra e roaa'i ta'u moni—e te hinaaro nei ta taata e rave rahi e inu i te ava.

Ua aufau vau i te moni no ta'u parau patana, ua tia ta'u ohipa i te ture fenua, e mai te mea aita vau e hoo atu i te ava na te taata, e riro te tahi atu taata i te na reira. Te ite nei au e te haapii nei te Bibilia, Eiaha e taparahi i te taata; e ore te taero ava e ô i roto i te Basileia no te ao; e te mana'o atoa nei au e ore te taata tei faataero i te taata i te ava e tae i reira, te hinaaro nei râ vau ia roaa ohie ta'u moni, e ua opua vau e rave noa i te moni no te hara, e e faaporua ia'u iho i te tao'a rahi a viivii noa'tu ai te taata atoa nei.

No reira e faaitoitoe roa vau i ta'u ohipa hooraa ava e pau ai te tao'a no te hui raatira e e tuu-paruparu-hia'i te Hau, No te mea e faito te manuïaraa o ta'u nei ohipa hooraa i te ava i to outou ite ore e te taiata, e tamata hua vau i te faaore i te ite e te viivii ore.

Mai te mea te mana'o nei outou aita e tia ia'u ia faatia i ta'u parau, a haere outou e ui atu i te feia tarahu moni, e mataitai haere i roto e te mau fare haavaraa, te mau fare oere, te mau fare ma'i, e te mau vahi e rîhia te taparahi taata, ei reira outou eite ai i te taata e rave rahi o tei inu i te ava i roto i to'u fare i mutaa ihora. Ia hi'o outou ia ratou ra, e ite ai outou e e tia ia'u ia faariro i ta'u parau ei parau mau roa. Te faaite atu nei au ia outou e mau maamaa outou atoa e e taata hoo ava parau-tia vau. Mas. 20: 1.

Te Mau Parau Api.

I te 25 no Tiunu i Amerika ua pohe oioi noa te taata ra o Gorova (Grover Cleveland) i te ma'i mafatu, i te 71 o to'na ra matahiti. E perezideni oia no te hau i mutaa ihora, i te m. 1884-1888 e i te m. 1892-1896.

I te 9 no Atete nei e tapae atu te nuu pahi tama'i no Amerika i te oire ra o Akarana, i Niu Zilani i to ratou mataitai-tere-raa na te mau fenua ra. Ei reira to Niu Zilani e faaarearea ai i to taua nuu pahi ra e ia ono mahana noa'tu, e e haapau ratou i e 30,000 dala i taua arearea ra.

I te avae ra o Atopa i mua nei e mono te titiro peni piti i te titiro peni pae i nia i te mau rata haponu mai Amerika'tu i Beritane. E tapao teie te haere nei taua na hau ra i mua, e na te reira faatereraraa apî e faarahi i te mau rata e haponohia, no te mea mea māmā te titiro i tei mutua ihora.

Ua tia noa ia haponu i te parau na roto i te reva ma te niuniu ore, noa'tu te atea o te vahi, na te uira e hopoi i te parau. I teie nei râ ua faaitohia e ua hamanihia te hoê machine o tei haponu i te parau na raro i te moana, aita hoi te niuniu. Tirara, ua huru papu ore râ taua ravea ra i teie nei.

Ua tere faahou te hoê pahi auahi no te hau Beritane i tua. E 50 matahiti te tapea-raa-hia taua pahi ra i roto i te pape paari i te pae moana i apatoerau. Te imi ra te mau taata i nia i te reira pahi i te vahi i apatoerau roa a haamauhia'i to ratou pahi i roto i te pape paari. Ua ora râ ratou e ua ho'i maira i to ratou fenua na nia i te tahi pahi.

Ua maere te taata i te hoê hora rahi apî i Amerika e 15 avae te roa no te rima iti e e 20 avae te roa no te rima rahi no taua uati ra; 256 kilo te teiaha no te rima hoê; te roa o te purumu i haerehia i te mahana hoê e te auru o taua rima ra, hoê afa maile ia. I te po e ama noa te mori uira i nia i te mau numera o taua mata uati ra ei haamaramaramaraa, ia tia ia ite-papu-hia te hora i te vahi atea roa.

Hou te tama'i ia Rusia 157 pahi tama'i ta Iapone, e 283,742 tone te taatoaraa ia amuihia; i teie na râ, e 204 pahi tama'i ta'na, e 515,082 tone ia amuihia. 19 ta'na mau pahi tama'i i pau i roto i taua tama'i ra e e 21 pahi tama'i no Rusia i riro ia'na. Te ani noa nei â te Emepera i te Apooraa rahi no te fenua ia faataahia â te moni rahi roa ei hamani â i te mau pahi manuâ. Ua mamû roa râ Iapone i te fenua e tama'ihia'tu.

E orure hau tei Inidia, te hoê aihuaraau no Beritani. U hamani te feia orure hau i te mau topita ei taparahi i te feia toroa. Te titau nei te hui raatira ia rahi â ta ratou mana i roto i te ohipa faatere hau.

I te 27 no Tiunu ua pape-pue-hia te hoê mataienaa i Taina. Ua imi te mau taata i te haapuraa i nia i te tapoi fare, e e rave rahi o te mau ruau i pohe i te toetoe. Mea pinepine roa te pape pue i Taina i teie nei â matahiti.

I te matuturaa tao'a no te hau Farani e te hau Beritane i Lonedona, i Tiunu i mairi a'enei, ua faaitehia te hoê poê a te hoê taata Autaralia, e 50,000 dara moni piru te hoo o taua poê hoê ra. E to te Tuamotu e, aita ta outou e poê mai tera te huru?

I te 19 no Tiurai ua reva'tu to tatou na taeae ra o Iosepha, ta'na vahine o Ane, e ta raua tau tamarii tamahine e piti ra o tei fanau i Papeete nei, e o Putera atoa hoi. Ua rave itoitoe Iosepha i te neneiraa i te vea ma te tarahu ore, e ua itoitoe roa Putera i te haapiiraa i te taata atoa i te evanelia a Iesu Mesia e ora'i. E toru a'e to Iosepha ma matahiti i teie paeau e e maha to Putera. Ei nia iho ia outou te hau o te Atua ra, e Putera ma e!

E orure hau tei roto i te hau Peresia. Te patoi nei te apooraa rahi hamani ture i te arii apî, no te mea te tamata nei oia i te faaore i te hoê mau ture maitai ta to'na metua arii i faatia a'e na, o tei faarepupirita i taua hau arii ra. Ua haruhia te mau aratai o te apooraa rahi e ua taparahihia te tahi pae e te arii. Ua haere atu M. Viriamu Doty, te Tonetara Amerika i Papeete nei i mua a'enei, ia riro ei Tonetara no te hau Amerika i taua hau Peresia ra.

Te haere nei te ohipa faaapuraa vavai i mua i te fenua ra o Amerika. Ua hau te vavai i faaapuhia i reira i te rahi i ta te mau fenua êe atoa. I roto i te m. 1907 ua faaapuhia e to te ao atoa nei e 15,200,000 pea vavai rarahi, e tei Amerika e 12,500,000 pea rarahi no taua taioraa ra i te faaapuraahia. Ua roaa te faufaa rahi i to Amerika i te hoora'a'tu i te vavai e hau a'e i ta te mau mea atoa i faaapuhia i reira. Mea rahi roa atoa te fenua au maitai no taua ohipa ra tei ore i tanuhia i teie nei.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank Cutler, Imprimeur,

Rue Bréa et de la rue Dumont d'Urville, Papeete, Tahiti.